



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Komunikadu Imprensa

27 Abril 2018

Selebra loron-Aniversáriu JSMP ba dala XVII:

JSMP Lansa relatóriu Anuál Setór Justisa no Lejislativu 2017 - Relatóriu Institusionál JSMP 2017 no Anunsia Rezultadu Kompetisaun Hakerek Notísia ho Sensivel Jéneru

Iha selebrasaun aniversáriu JSMP ba dala XVII, ne'ebé monu iha 28 Abril, sei selebra iha 27 Abril 2018, no sei marka ho agenda lansamentu Relatóriu Anuál Observasaun Jerál ba Setór Judisiáriu (OJS) tinan-2017, Relatóriu Observasaun Parlamentár (ROP) tinan-2017, hamutuk ho Relatóriu Institusionál JSMP ba 2017. Aleindé sei anunsia rezultadu kompetisaun hakerek notísia justisa ho sensivel jéneru.

Normalmente hanesan tinan sira anterior, JSMP institusionalmente iha tradisaun ida atu komemora aniversáriu JSMP nian ho lansamentu ba relatóriu observasaun regulár kona-ba dezenvolvimentu importante no dezafiu sira iha setór judisiáriu no lejislativu ba publiku Timor-Leste hanesan forma ida atu kontribui ba dezenvolvimentu iha setór xave rua ne'e.

“Selebrasaun aniversáriu ba tinan ida-ne'e diferente uitoan tanba enkaixa mós ho atividade kompetisaun hakerek notísia ho sensivel jenéru ne'ebé envolve jornalista sira hosi mídia imprime no online,” dehan Luis de Oliveira Sampaio, Diretór Ezekutivu JSMP.

Atividade kompetisaun hakerek notísia ho sensivel jéneru realiza ho kolaborasaun entre JSMP, Sekretária Estadu Igualdade Jéneru no Inkluzsaun Sosiál (SEIGIS) no Konsellu Imprensa (KI).

Kompetisaun ne'e inisia ho objetivu atu promove koñesementu jornalista sira hodi hakerek no publika nutísia ne'ebé sensivel ba jéneru no evita linguazem sira ne'ebé bele iha tendénsia atu hametin liután kultura violénsia hasoru fetu.

JSMP observa katak iha titulu notísia barak mak reflète linguazem ne'ebé '*bias gender*' no nakonu ho diskriminasaun hasoru fetu no labarik fetu sira. Kompetisaun ne'e serve hanesan meu ida atu promove konsensia publiku hodi halakon violénsia bazeia ba jéneru iha Timor-Leste.

Iha parte seluk, relatóriu hirak ne'e konstitui elaborasaun no observaun JSMP nian kona-ba progresu no dezafiu sira iha setór judisiáriu inklui prosesu kazu sira iha tribunál no prosesu lejislativu iha Parlamentu Nasionál no akontesimentu importante sira ne'ebé JSMP rejista durante tinan 2017.

Relatóriu Observasaun Jerál Setór Judisiáriu diskuti faktu sira kona-ba progresu no dezafiu sira iha setór justisa nian, inklui estatística kazu sira ne'ebé julga iha tribunál distritál sira no Tribunál Rekursu durante tinan 2017. Partikularmente relatóriu ne'e elabora kazu sira ne'ebé julga iha tribunál sira, hanesan krime violénsia doméstika, violasaun seksuál, krime ho natureza ezersisiu funsaun públiku no krime ordinariu sira seluk lori ba tribunál.

Relatóriu Observasaun Parlamentár konstitui informasaun ne'ebé JSMP halibur husi rezultadu servisu observaun iha PN durante tinan 2017, partikularmente observaun crítica ba situasaun política póstu eleisaun parlamentár 2017 nian. Sesaun lejislativu ida-ne'ebé interompidu tanba empase politiku iha PN ne'ebé rezulta fó impaktu sériu ba funsionamentu Parlamentu Nasionál, partikularmente Lajizlatura IV.

Enkuantu Relatóriu Instituisaun JSMP tinan 2017-nian, rezumu atividades JSMP nian durante tinan 2017 nia-laran tomak inklui koperasaun institusionál ho instituisaun xave no rede nasional no internasionál sira. Relatóriu ne'e mós dekreve apoiu finansiamentu ne'ebé JSMP simu doadores sira nu'udar justifikasaun no forma akuntabilidade ba públiku.

JSMP hein katak faktus sira ne'ebé elabora liuhosi relatóriu hirak ne'e bele fornese informasaun útil ba públiku iha jerál no partikularmente órgaun no instituisaun Estadu relevante sira. Liuliu relatóriu bele serve hanesan referénsia atu bele kontribui direta no indiretamente ba hadiak funsionamentu sistema justisa formál no lejislativu iha agora no ba futuru.

Relatóriu ne'e konklui ho rekomendasaun importante no relevante balun ne'ebé sei dirije direktamente ba órgaun no instituisaun kompentente no relevante sira atu bele tau iha konsiderasaun.

Atu hetan relatóriu hirak ne'e bele asesu iha website JSMP <http://jsmp.naroman.tl> depoisde lansamentu ne'ebé sei disponivel iha lian Tetun no Inglés.

Atu hetan informasaun liutan favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl